

ELEGIA ACADEMIAE VIENNENSIS

AD MAXIMILIANVM INCLYTVM BOHEMORVM REGEM

ET AVSTRIAE ARCHIDUCEM ILLUSTRISSIMVM, &c. QVA

illi de reditu & matrimonio felici
gratulatur.

145

Fama meas nuper cùm peruenisset ad aures,
Qua mihi non vnquam gratior vlla fuit:
Huc ad nos tandem te, Maxmiliane, reuerti
Inde, vbi fulua fluit diuitis vnda Tagi.
Illico tanta meam subierunt gaudia mentem,
Non breuibus verbis quanta referre queam.
Vtque sibi caro mulier quæ fortè marito
Per longum spacium sola relicta caret:
A patria saluum cùm non procul audit abesse,
Lætitiæ exultans nescit habere modum:
Vtque suum nati gaudent rediisse parentem,
Hospes in externo qui fuit orbe diu.
Sic gauisa tuo reditu sum, maxime Princeps,
Vsque adeò vt mecum non satis ipsa forem.
Tunc igitur cupij, votoque flagrante petiui,
Mille mihi linguas oraque mille dari.
Vt mea per totam vulgarem gaudia terram,
A te quæ nomen nymbifer Auster habet.
Vtque tibi nostrum declararemus amorem,
Qui mihi nunc deinceps omnia solus eris.
Qua potui tamen, hac volui ratione placere,
Hæcque fero imparibus carmina facta modis.
Ex quibus, vt spero, cognoscet quisque bonorum,
Quàm venerer, quàm te non simulanter amem.
Forfan & è nostris aliqui inuenientur alumni,
(Rursus enim iam sum mater, vt antè fui)
Matris ab exemplo tibi qui placuisse laborent,
In reditu & plaudant, exiliantque tuo.
Gratulor ergo redux nostras quòd factus in oras,
Cum tibi dilecta coniuge saluus ades.
Coniuge, quam casto socij tibi fœdere lecti
Felici iunxit sidere faustus Hymen.
Qua te nulla magis reperiri digna marito,
Scandere quæ potuit sola cubile tuum.
Nanque nec (audiui, nec me fama illa fefellit)
Hac est nobilibus moribus vlla prior.
Vlla nec ingenio facili præstantior vsquam,
Vlla nec ob formam suspicienda magis.
Cedant, plus veteres quicunque Heroidas æquo
Ad rutili tollunt laudibus astra poli.
Illarum nulla est, quam non hæc regia coniunx
Vincat præclaris innumerisque bonis.
Adde, quòd & veræ pietatis sedula cultrix,
Vt decet, æternum nouit, amatque Deum:
Ipsa ego, cùm thalamum pariter venistis in vnum,
Hæc res est, dixi, quæ fit agente Deo.

Hasque tibi tum sum tædas gratata iugales,
Vt fortunaret, sumque precata Deum.
Cùm procul occiduis te terra teneret in agris
Fertilis, aurifero quam rigat arne Tagus:
Cumque tui traheret reditus spe, sed mora lenta
Conficeret curis meque meosque tamen.
Nunc tibi præsentem præsentem positoque timore
Gratulor, ô nostrum, Maxmiliane, decus.
Vtque sit hic, opto, felix hymenæus, & orbi
Terrarum afflictò commoda multa ferat.
Hoc pater omnipotens, qui fulgida sidera torquet,
Omniaque ex illa conspicit arce, velit.
Flagitat hoc sæuis Ecclesia pressa procellis,
Dum furit hoc Satanas tempore mille modis.
Flagitat hoc etiam non vna parte laborans
Publica res, per te restituenda sibi.
Hoc omnes orant, communis cura salutis
Quos tenet, & rerum quos status iste mouet.
Hoc ego cum cunctis, qui culta Licea frequentant
Nunc mea, sollicita posco subinde prece.
Nam mihi polliceor certam te Rege salutem,
Quamuis fors non sit nunc quoque flenda mea:
Aurea enim redeunt, quæ quondam secla fuerunt,
Et mea iam fama est reddita penè mihi.
Huc iterum iuuenes concurrunt vndique, castæ
Quos inuicta iuuat Palladis arma sequi.
Ipsa suas iterum profitetur sancta Minerua
Hic artes, assunt Pegasidesque Deæ:
Sed maius quiddam tamen auguror esse futurum,
Tempora si mihi tu multa superstes eris.
Cumque tuis pariter si prosperitate frueris
Fortunæ, virtus qua sine sæpè labat:
Ergo te Christus seruet cum coniuge cara,
Nestoreos vobis viuere detque dies.
Det sobolem videas, & qui nascentur ab illa,
Det, sternas hostes victor vbique tuos.
In primis contra cum moueris arma tyrannum,
Impietas cuius sine modoque caret.
Muniat angelica tum te, cingatque cohorte,
Et det, Marte tuo bestia fœda cadat.
Hoc precor, hoc supplex ego numina sancta precabor
Donec in hoc aliquod nomen habebo solo.
At tu lapsarum spes vnica & optima rerum,
Dulce decus nostrum præsidiumque vale.
Maxmiliane vale, Rex maxime, meque reuerso
His fer gratatam versibus esse tibi.

VIENNAE AVSTRIAE

excudebat Egidius Aquila, Anno

Domini, M. D. LII.

J. S. S. Z.

